

Stimadas votàntas a stimos votànts

Las suprastànzas digls vaschinadis politics da Casti-Vargistagn, Donat, Lohn a Mathon sutametàn a Vus igl messadi a la proposta partutgànt la fusiùn digls quater vaschinadis.

A. Punct da partenza ad analisa

La situaziùn da partenza ad igls resultats a las retscheartgas partutgànt la fusiùn en vagnieus preschantos agl raport final digls 5 da zarcladur 2020. Quel vez Vus ratschiert igls 8 da zarcladur 2020 ansemel cugl cuntract da fusiùn ad igl tschantamaint d'agricultura. Plenavànt e el cargieu sen las paginas digls vaschinadis. Quels documaints lubeschàn a Vus, stimadas votàntas a stimos votànts, da safar egn menì fundo an vesta agls travaschegns digls 26 da zarcladur 2020.

Igls 1. da november 2019 e'gl vagnieu fatg egn'infurmaziùn intermediara, igls 12 da zarcladur 2020 egn'infurmaziùn par l'agricultura ad igls 19 da zarcladur à gieu liac l'infurmaziùn finala par tut la populaziùn.

B. Cuntract da fusiùn

Savund igl artetgel 63, paragraf 1 da la lescha da vaschinadis digl cantùn Grischùn regleschan igls vaschinadis partizipos da la fusiùn an egn cuntract la fusiùn intenziunada. Igl cuntract e giuridicameing igl elemaint zentral d'egna fusiùn da vaschinadis. An quel vignan fixadas regulaziùns an vesta a la fusiùn, c'en liàntas pigl vaschinadi futur sco ear pigl prozeder antoc'igl vaschinadi nov aintra an vigur. Par ordinari en igl cuntracts da fusiùn relativmeing curts, parquegl c'igl vean reglo an quels me igls puncts ple impurtànts.

Igl cuntract à da vagnir prieu par bien antras la regenza. La fusiùn aintra an vigur cun la dezisiùn digl cunzegl grànd.

Igl suveran da tut igls quater vaschinadis fa la vuschada mintgegn daparse savund igls urdens da cumpetenza existents agls singuls vaschinadis. An tut igls quater vaschinadis e quegl igl tarvaschegns.

C. Giudicat general a proposta

Igl giudicat antras las quater suprastànzas

- Las retscheartgas da la grupa da project àn musso, c'igls avantatgs d'egna fusiùn predomineschan par l'antiera populaziùn da la Muntogna da Schons.
- Igl vaschinadi fusiuno Muntogna da Schons vean ad easser egn vaschinadi cun blears interess cuminevels ad egna fearma identificaziùn, egn vaschinadi c'e preparo par las sfidas digl avagnir.

La proposta

Las suprastànzas digls quater vaschinadis politics da Casti-Varginstagn, Donat, Lohn a Mathon proponan a Vus da prender par bien la cunvegna da fusiùn.

L'amparada a caschùn digls tarvaschegns digls quater vaschinadis sacloma:

**LEZ VUS,
STIMADA VOTÀNTA A STIMO VOTÀNT,**

**PRENDER PAR BIEN IGL CUNTRACT DA FUSIÙN
A CUN QUEGL PRENDER PAR BIEN LA FUSIÙN DIGLS VASCHINADIS
DA CASTI-VARGISTAGN, DONAT, LOHN A MATHON
AGL VASCHINADI MUNTOGNA DA SCHONS ?**

Casti-Vargistagn, Donat, Lohn, Mathon, igl zarcladur 2020

Las suprastanzas